

Nama Reti Kristen?

BAGI KE SATU

Kitai ENDA TAU ENDA arap ka Jesus!

- 1) Paul nerang ka reti Berita Manah ka ditusoi iya ngagai orang di Korint menya. (1 **Korint 15:1-4**); *“¹Diatu menyadi, aku deka ngelalau kita pasal Berita Manah ti udah ditusoi aku ngagai kita, ti udah disambut aku, enggau ti endur pengarap kita bepegai teguh. ²Ulih Injil ti udah ditusoi aku ngagai kita, kita tau di-idup ka baru enti kita bepegai teguh ba iya; enti enda bakanya kita semina arap ngapa (bisi pengarap tang nadai reti). ³Aku meri utai ti udah disambut aku ngagai kita, iya ti pemadu besai guna, iya nya Kristus mati kategal dosa kitai, baka ti udah ditulis dalam Bup Kudus. ⁴Iya udah dikubur, lalu Iya udah di-angkat idup baru ba hari ti katiga udah lepas nya, baka ti udah ditulis dalam Bup Kudus.”*
 - i. Genteran 1; Paul nusoi ngagai kitai, Berita Manah ti udah disambut iya lalu nusoi nya ngagai kitai. Iya ngelalau kitai awak ka Berita Manah nya tau nyadi ka endur alai pengarap kitai tau bepegai teguh, reti nya arap ka Jesus enggau pesan Iya.
 - ii. Genteran 2; Mayuh gerija ti agi ngembuan raban ti bedau kering dalam pengarap. Sekeda amat tegap, sekeda baru deka arap enggau sekeda ngaga diri sereta bisi mega ti nyaru diri. Nyadi raban kristian ti bakanya, disema ka baka sempama Jesus pasal lalang (**Matthew 13:24-30**). Ba siti gerija nya, bisi orang ti manah ti amat ngasi ka Tuhan, tang bisi mega sida ti semina disebut nyadi orang kristian tang enda ngasi ka pesan Kristus. Pengujong iya, sida ti nyaru diri enggau ti ngaga diri deka bulih pengerusak. Tang sida ti amat ngasi deka diengkah ka ba endur ti manah.
 - iii. Genteran 3 & 4; Tu meh reti Injil ti bendar, dikena kitai meri penerang ngagai orang bukai pasal ti nyadi kristian. Bisi tiga bengkah utai pemadu beguna ditu;
 - a) *Kristus mati kategal dosa mensia nitih ka ditulis dalam Bup Kudus.* Enti nadai pemendar ba pesan tu, pemat Kristus nadai reti mimit, lalu mega barang sapa ti arap ka Jesus, agi mengkang bedosa sereta nadai bulih pengadang. Tang utai ti bendar, Jesus Anak Allah Taala ti nadai dosa, udah di-ukum awak ka barang sapa ti arap, dosa sida deka di buai. Jaku nya dikamat ka dalam Bup Masmor 16:8-11 enggau Bup Isaiah 53:5-6. Pemat Kristus ukai sengapa nyadi tauka jerita digaga ngapa, tang nya endang udah langgur Allah Taala kenya ari kalia, ngambi ka ulih meri pengelepas ngagai sapa ti arap.
 - b) *Iya di kubur.* Pasal pemat Kristus udah di ayan ka, lalu Iya endang amat dikubur. Mayuh orang enda arap ka Jesus endang amat mati, tang iya ka bendar Jesus endang mati, lalu di-engkah ka dalam kubur.
 - c) *Iya udah di-angkat idup baru ba hari ti katiga udah lepas nya, baka ti udah ditulis dalam Bup Kudus.* Kristus endang udah di-angkat ka idup baru belama iya. Apai ti di serega udah ngidup ka Iya ari dunya pemat, ba hari ti katiga udah lepas Iya dikubur, ianya Iya dikubur lepas tengahari ari Lima ngagai pagi hari Minggu (bansa Judah, ngira tu tiga

Nama Reti Kristen?

hari). Dalam Bup Matthew Jesus bisi nyebut pasal pematI Iya, sabaka enggau pengelama Jonah diau dalam perut ikan besai, tiga hari tiga malam (**Matt. 12:40**). Lalu Masmor 16:8-11, ngamat ka pengangkat Jesus ari mati.

- 2) Tu meh penerang pasal Injil ti dipejalai ka Paul maya tu kalia, ka udah disambut iya ti pemađu besai guna. **Jesus mati kategal dosa kitai**. “*Laban kita tentu nemu tu, lebuđu kita nyerah ka diri baka ulun ti ngasi ka jaku tuan, kita endang ulun orang ti dititih ka kita; sekali ka dosa ti ngasuh kita mati tauka pengasi ti ngasuh kita lurus di mua Allah Taala*” (**Rome 6:16**).
 - i. Jesus mati karegal dosa kitai, laban Iya deka ka kitai dipeda lurus ba mua Allah Taala, tambah mega awak kitai tau nyadi ka ulun pengelurus ti ulih ngiring kitai ngagai pengidup ti meruan.
 - ii. Ulun dosa nya ti mai kitai bulih pengerusak. Laban upah dosa iya nya pematI belama iya, tang upah kitai ti arap ka Jesus, iya nya pengasih Allah Taala ti ngiring kitai ngagai pengidup ti meruan belama Iya, (**Rome 6:23**). Tang enti kitai arap lalu nitih ka ajar Jesus, kitai deka nyadi ulun pengelurus, (**Rome 6:18**).
 - iii. Semua orang nguji ngiga ketuaI diri empu, lalu nitih ka iya ti nyadi ketuaI Perati ka ulih kitai enti Jesus nadai! Laban enti nadai Iya sapa agi alai kitai milih? Kebuah baka nya, semua ti madah ka bisi ngembuan pemendar mai kitai nuđu pematI magang nyadi ulun dosa. Sapa ti ulih ngampun dosa kitai? NADAI! Adat nadai ulih ngasuh dosa kitai ulih dibuai, semina kitai dipeda orang manah ari luar aja, tang dalam agi kosong. Tang diatu kitai bepanggai ba Kristus nyadi ka KetuaI, lalu meri kitai kuasa ngaga utai badas awak enda ngereja penyai.
- 3) Ulih kitai ti ukai ulun dosa agi, tang kitai deka digaga lurus di mua Allah Taala, (**Rome 5:1**). Kenyau ari menya kitai mensia tu endang bela bepenyalah, lalu kitai nadai ulih ngenatai ka diri ngagai Allah Taala, (**Rome 3:23**), tang **PENGASIH** ti nadai bebayar ka diberi TUHAN ngagai kitai, kitai deka nyadi orang lurus, ketegal Jesus Kristus ti nebus dosa kitai, (**baris 24**).
- 4) **Bakani aku tau arap ka Jesus ti amat meri pengelepas lalu nebus dosa aku enggau semua mensia?**
 - i. Pengasih Allah Taala nadai alai kitai ulih nyema, Iya balat rindu ka kitai mensia, lalu barang sapa ti arap enda mati, tang bulih pengidup ti meruan belama iya, (**John 3:16**).
 - ii. Pengarap orang Kristian iya nya pechaya ka Kristus udah nanggung dosa kitai lebuđu Iya mati diatas kayu regang (**John 19:18**), Iya nyadi ka piring ti idup dikena nebus dosa kitai (**John 1:29**), Iya dikubur (**Luke 23:53-54**), hari ti katiga udah nya Iya lalu angkat idup baru ari mati (**Matthew 28:6**), mandang ka pemenang dalam Kristus udah ngalah ka dunya pematI lalu ari nya kitai tau bulih pengadang ti tetap.

Nama Reti Kristen?

- iii. Enti kitai udah mati jemah ila, kitai deka di-angkat ka idup baru lalu bulih idup meruan dalam Yesus. Laban ulih siti dosa kategal siku mensia ti bedosa semua di-ukum, lalu bakanya mega ulih siku mensia ti nadai dosa ngaga siti kereja ti lurus, mensia digaga lurus lalu enda di-ukum (**Rome 5:18-19**).
 - iv. Penyai dosa kitai udah dibayar Yesus ngena darah Iya, ngambi ka kitai tau ngasai ka ulih bakaul enggau Tuhan (**Kolosi 1:14**). Ari nya tadi kitai ulih nagang diri ari ngereja pengidup ti deka ngereja penyalah, bejalai sama-sama enggau Tuhan dalam pendiaul ti penuh enggau pemaik, “*Sekeda amat nerima Iya (Yesus) lalu arap ka Iya; nya alai Iya meri sida kuasa nyadi anak Allah Taala. Sida nyadi anak Allah Taala ukai ari darah tauka peneka tubuh (ukai diperanak ka mensia) ukai mega ulih bapai ka mensia, tang Allah Taala empu ti Apai sida*”, (**John 1:12**). Peda mega (**1 John 3:1**).
- 5) **Nama kebuah kitai ngangau ka Yesus Tuhan (Isaiah 9:6)?** Jaku nya endang enggau Allah Taala, Iya endang Allah Taala lalu ulih Iya Allah Taala ngaga semua utai, (**John 1:1-3**). Anak mit ka di-ada ka Maria deka dikumbai Anak Allah Taala, (**Luke 1:35**). Yesus nerang ka; “*Apai enggau Aku endang siku aja,*” (**John 10:30**). Yesus madah ka diri, Iya aja meh Jalai, Pemendar enggau Pengidup, (**John 14:6**). Yesus aja ulih meri pengangkat enggau pengidup ka orang ti udah mati, (**John 11:25**). Nyadi tu sekeda, ngenang pasal Yesus nya endang amat Tuhan, mayuh agi ti ka bukai, ti enda ulih ditulis ka ditu.

Udah tu peda BAGI Ke Dua – Di Ada Ka Baru.....